

Letter 609: 3 May 1536, [Basel], Adelberg Meyer zum Pfeil to Capito and Martin Bucer

The manuscript of this letter is in Strasbourg AVCU, AA 462, f. 97.

Liben hern und freund, donnach wir durch unser furgeliept frund und vertraut nachparn die dreyzehn der Statt Straßburg der versamlung so der eerwurdig, hochgelert her doctor Martin Luther ir und andere diener des hern worts unsere lieb hern und christenliche mitbruder, umb vereinbarung des strites der sich bisher mit one schweren shaden ergernuß und anstoß der kilchen Christi im artickel des sacraments des libs und bluts unsers lieben hern und denocht mer inn worten den der houptsach gehaltenn; den vierten Sontag nach verchiner Ostern zu Ysenach zeleistens willens beruht worden, haben wir ab solichem convent und uweren christenlichen furnnhemen ein herzlich freud empfangenn; dann so wir betrachten was nutzes der kilch Christi auß diser vereinbarung ensten wusten wir als die den friden und einigkeit der kilchen zesechen begierig nut frolichern dann angezegte eingikeit zeverwenen. Darumb wir Got von herzen bitten, das er uch umb der Eere willen sins heiligen namens sin gnad und geist geben und verlichen wolle, damit gesagte vereinbarung im herrn warhafftig geschehe.

Und wiewol wir yemanden von unsern predigern zu uwer versammlung zeschickenn sy ouch dieselbige zebesuchen und mit dem wolgedachten hern doctor Martin Luther (mit dem wir im herm vereinigt zesin herzlich begeren) frunthlich zebesprechen gneigt, ist unns doch solichs wie uwer lieb wol ermesen mog, von wite des weges und kurtze der zit dismal nit muglich; diewil inhaber unserer kilchen gelegenheit, auch das unns angeregter Convent äben spat verkundet; unverborgten, bitten wir uch ganz frundlich ir wellen uns das wir niemanden geshickt by gemeiner versamlung zum basten entschuldigen, inen das wir zu rechter warte christlichen vereinigung gantz begirig und gneigt syen anzeigen und darby uch unsere kilchen inn truwen lassenn bevolchen; fur das begern wir zeverdienen, hieby wollen wir uch im hern christennlich vermant habenn inn diser versamlung was zu uffbuwung und warhaffter einigkeit der kilche Christi und heiligung des namen gottes dienen mag ernstlich zehandlen wie wir uch zethunt gesinnet wissen. Das wurt on zwivel allen christen vil froid und trost und den verfolgeren dessen wort so ab unser spaltung vil froid gehept grossen schrecken gebenn was wir dann zu solich mit got furderen mögen sol by uns nit erwinden herr mere uch sin gnad. Datum den iii<sup>ten</sup> Maii anno 1536.

Adelberg Meyger.

[Address]: Hern Doctor Wolffgang Capiton und Marin Butzer.